

Bainvegni a Flem/Surselva

Avertura festiva da la sessiun d'atun dal parlament federal extra muros en il Grischun

DA MARTIN CABALZAR

■ En moda festiva e cun buna luna ha il parlament federal avert ier suenter mezdi a Flem la sessiun d'atun. Tant il parsura dal cussegl naziunal Claude Janiak sco cusseglier federal Pascal Couchepin han animà da sa fatschentar en las proximas trais emnas pli intensiv cun ils problems da las minoritads e da las regions muntagnardas e periferas. Suenter Geneva (1993) e Lugano (2001) è Flem la terza sessiun «extra muros» che èn daventadas necessarias pervi da la restauraziun da la chasa federala. La sessiun champestra en il Grischun sco sulet chantun triling da la Svizra saja cunzunt er ina reverenza a la Svizra rumantscha. Era sche la noziun rumantscha «Flem» vegnia strusch pli duvrada a «Flims» saja Flem in lieu exemplaric per demonstrar cun tge numerus problems il mantegniment dal linguatg e da la diversidad culturala sajan colliads. Ina na tanschia betg mo cun declamar la quadrilinguitad, ins stoppia era laschar suandar pass concrets per exempel cun la nova lescha da linguas.

Il parsura da la regenza grischuna *Claudio Lardi* ha en in pled spiritus ed umoristic accentuà ch'il contact cun la populaziun rumantscha e cun sia lingua materna vegni a cumprovar che la quadrilinguitad n'è betg mo in



Cun intginas chanzuns rumantschas ha il Chor viril Ligia Grischa dirigi dal vicedirigent Umberto Camathias marcà preschientscha rumantscha e procurà per ina avertura da la sessiun parlamentara a Flem/Surselva.

FOTO G. VENZIN

mitus en Svizra. Ina visita en las regions rumantschas vegnia dentant er a cumprovar ch'i na basta betg mo da chantar qua e là davart la plurilinguitad per la man-

tegnair e promover. La dimora en il Grischun vegnia plinavant er a documentar a moda plausibla che «il Grischun n'è betg in model ecologic antiquà e ch'il Grischun

n'è betg in desert alpin e ch'el vegn er mai a esser in tal». Il president communal *Thomas Ragetti* ha beneventà il parlament en ses vitg e giavischa buna dimora

citond la sentenza greca ch'il divertiment saja il cundiment da la lavur.